

左恪靖侯奏稿初編

恪靖奏稿初編卷九目錄

補授閩浙總督謝

恩摺

奏報截勦富陽新城援賊大勝小挫情形摺

覆陳裁汰閩軍並臺灣等處軍情片

附陳誘獲盜首顏馬登等斬梟片

奏報浙師越皖援江迭獲勝仗情形摺

軍中忠疫擬俟秋涼力圖進取片

請設閩浙總糧臺派員總辦摺

請將已革道員勒追京米捐款再行捐輸賑米片

請將貪橫不法之蕙擬督軍擊查抄摺

遊員委署提督篆務片

補授閩浙總督謝恩摺

奏爲恭謝

天恩仰祈

聖鑒事竊臣於四月初八日嚴州營次准兵部火票遞到同治二年三月十八日內閣奉

上諭閩浙總督著左宗棠補授仍兼署浙江巡撫欽此

跪聆之下感悚難名四月廿四日准前督臣耆齡委護

理督標中軍副將郭什春候補通判薛嶸恭齋福建浙

江總督關防一顆福建鹽政印一顆到臣當卽恭設香

案望

闕叩頭祇領任事伏念臣湘水庸材草茅下上讀書未  
通世務徒竊虛聲學戰謬廁戎行鮮裨大局乃荷  
先皇帝特達之知由舉人不次拔擢游至正卿

皇帝御極之初復蒙

畀以封疆重寄方憂時事之艱未呈寸效更沐

溫綸之賚竝縮雙符自顧何人膺竝寵遇敢不竭忱盡  
瘁以期稍答

思知惟念兩浙則瘡痍待起搶攘未遑八閩亦厝積堪

虞綱繆宜預如臣 駑鈍實懼弗勝幸閩撫臣 徐宗幹於

吏事一切矢志澄清從前昏黷之風爲之稍息總督衙

門例行事件仍出閩撫臣 代辦可期無誤前督臣 耆齡

甫卸軍務目睹軍食匱乏情形自當整理海關稅務力

圖接濟臣 惟虛衷商榷共濟艱難其閩省軍務及一切

緊要公事臣 責重兼圻義無旁貸總期竭臣 思慮所能

及才力所可到者竭蹶圖維以求仰副

高厚生成於萬一所有微臣 感激下忱謹繕摺附驛馳

奏恭謝

天恩伏乞

皇上聖鑒訓示施行謹

奏 同治二年四月廿八日

議政王軍機大臣奉

旨知道了欽此

奏報截剿富陽新城援賊大勝小挫情形摺

奏爲官軍截剿富陽新城援賊三大勝一小挫現籌辦理情形恭摺馳

奏仰祈

聖鑒事竊富陽新橋援賊經蔣益澧擊敗後伏匿不出勢甚窮蹙僞忠王李秀成嚇僞聽王陳炳文舍蘇州之常熟昭文不圍而急援富陽並糾邀蘇常賊黨挑選杭嘉等處悍賊踞守嘉興石門之僞歸王鄧光明新橋僞主將汪逆黃逆等由餘杭趨臨安圍竄新城以襲富陽



官軍後路維時花旗粵賊亦分股由績溪回竄清安分  
水地界繞越新城臣以富陽新橋兩處賊匪屢誘不出  
必有詭謀查杭屬新城縣城地勢足以屏蔽桐廬與富  
陽官軍相爲犄角前調遊擊賴錫光擬保副將李錫回  
率精捷兩營駐之尙嫌單薄當飭魏喻義一軍二千人  
馳回新城以備截擊魏喻義甫抵新城疊據探報聽逆  
糾集各股竄踞觀音山板橋一帶進紮山口距新城僅  
三十餘里四月初一日魏喻義會同賴錫光李錫回等  
進剿遇賊大至官軍槍礮環擊斃賊數百名賊死拒不

退魏喻義分軍由小路抄之而自率親兵與賴錫光等  
所部殲其先鋒賊目數名奪獲旂幟槍礮刀矛數千件  
一賊騎黑馬掠陣官軍圍之數重有賊數十騎擎洋槍  
護之突圍而出僅於道旁獲其黃呢大轎訊之活賊僉  
稱卽偽聽王也是夜五鼓偽朝將汪逆復分路來犯比  
曉已至永昌時山霧漫空咫尺莫辨魏喻義督軍迎剿  
賊潛從林谷中抄出官軍奮威衝殺賊愈裏愈厚鏖戰  
三時弁勇亡傷數十名都司楊陞斌身受重傷守備劉  
立號力戰陣亡官軍後路已爲賊斷魏喻義遂率所部

且戰且退至城東南收隊入城逆賊躡蹤而至顏錫光等督隊由南門出擊賊勢稍却一面將附城房屋拆去一面嚴守城堞布置稍定賊已合圍火箭噴筒迸射城內環攻兩時賊多傷斃遂稍退卻三更後又分三路撲城拔開木檣梯城而上官軍伏於牆內俟其逼近發礮石擊之斃賊不知其數方魏喻義之退保新城也蔣益澧得報卽遣記名總兵熊建益率數營出賊後擊之甫至板橋殺尾賊百餘名生擒五十餘名獲賊米數十石而還蔣益澧慮新城兵單急遣記名提督高連陞復率

數營馳援而自率親兵督之令熊建益回防新橋之賊  
初三日高連陞馳抵新城之南臣飭楊昌潛率十營往  
援亦陸續行抵桐廬賊見援軍大至拋棄攻具向臨安  
一路鼠竄而去高連陞亦僅斬其尾賊數十名而還是  
日新橋之賊見宜軍方援新城忽出賊數千分路來犯  
熊建益督隊施放槍礮斃賊甚多賊敗入壘熊建益乘  
勝攻之右臂爲洋槍所洞猶裹創力戰率親兵踰重濠  
而進直薄城壘猱騰而上賊勢大亂壘垂破矣熊建益  
忽被賊洋槍洞穿小腹親兵向前搶護還營刻卽殞命

賊亦不敢復出蔣益澧聞耗當卽折回新橋料理一切  
時臣派往援剿之羅大春簡桂林楊鼎勛陳彝爵四營  
已抵新城蔣益澧遂將高連陞軍調回新富適申之  
地駐紮以便往來策應初六日馮聽王及各逆由桐嶺  
謝聖嶺干家村一帶至洪莊上陳泗洲庵等處布陣數  
十里誓破新橋官軍管學初七日蔣益澧正擬出隊迎  
剿該逆已分股逕撲王東林曹魁甲兩營官軍列隊仰  
攻相持兩時之久王東林曹魁甲身冒礮石奮力衝進  
立斬悍賊十餘名賊敗歸對山復分大股僕高連陞營

壘高連陞分軍埋伏左右自率親兵嚴陣以待俟賊撲  
近開礮轟之立斃黃衣賊目一名先鋒悍賊數十名賊  
退却伏兵左右抄擊賊大敗王東林等復從後截殺共  
斃賊四五百名陣斬偽朝將李逆等賊目三十餘名生  
擒數十名賊之爲槍礮轟傷者殆以千計而逆賊抄襲  
富陽官軍後路之計始沮矣先是水師副將楊政謨都  
司羅啓勇聞杭城之賊隨聽逆上竄料杭城準備必疏  
初一日各率所部師船沿江而下駛抵閘口遇賊船百  
餘號當卽開礮轟擊二品頂戴遊擊布良帶等見師船

自上游駛至卽各督所部戰艇開礮夾擊逆賊不能抵敵紛紛逃潰楊政謨羅啓勇等登岸追賊直抵杭州望江門外踏毀賊壘一座殺賊數百焚燒賊船數十奪賊船三十餘號杭州踞逆大震屢呼聽逆及僞朝將汪逆等回援該逆等知官軍後路嚴密無隙可乘又杭州之賊呼援甚急遂鼠竄回杭此陸軍迭次截剿富陽新城援賊水軍直搗杭城三獲大勝一以臣小挫之實在情形也臣維官軍之規取杭城原圖掣賊北竄之勢蘇常各賊之急援杭州本在意料之中其徑犯新城妄思抄襲

官軍後路乃逆賊慣技新城城小而固我以重兵駐此  
以主制客以逸待勞雖賊勢悍而且眾亦何能爲惟以  
規復杭城局勢而言非重兵由新城臨安直指餘杭不  
能扼杭城之吭而拊富陽之背臣原擬劉典一軍肅清  
皖南後即可由分水臨安直指餘杭乃徽休祁黟雖以  
次肅清而賊由池屬建德犯江西饒景劉典一軍勢難  
遠撤且恐饒景喫緊仍須兼顧江西而皖南之太平石  
埭建德尚有餘賊踞守劉典如赴饒景之援尙須分兵  
駐守皖境以遏賊衝更何能爲直指餘杭之舉通計臣



軍水陸馬步共祇三萬餘人除劉典王文瑞兩軍之在  
皖者已一萬有奇蔣益禮全軍之攻富陽者亦一萬有  
奇臣復撥水師馬隊助之其餘各營除分撥下游新城  
桐廬及紹郡之義橋一帶上游之淳安遂安兩縣外尙  
須分防衢州金華嚴州兵力實爲不厚其甯波一軍頗  
形冗雜現正陸續汰遣前督臣耆齡所轄各軍亦苦統  
領乏材急須分別去留束以營制專其責成乃可收餉  
節兵精之效臣惟力圖整飭務期實濟而免虛糜如新  
隸各軍漸有把握機會可乘臣自當迅速以赴戎機斷

不敢稍涉遲延自干咎戾所有此次陣亡之記名總兵  
熊建益樸勇善戰隨征十年勞績卓著入浙以來尤所  
向有功茲以憤攻賊壘中礮捐軀深堪憫惻合無仰懇  
天恩飭部照總兵陣亡例從優議卹

予諡並於富陽縣建立專祠守備劉立號併請

旨從優賜卹以慰忠魂所有截剿富陽新城援賊獲勝  
及籌畫情形謹據實直陳伏乞

皇上聖鑒訓示施行謹

奏 同治二年四月廿八日

議政王軍機大臣奉

旨另有旨欽此

覆陳裁汰閩軍并臺灣等處軍情片

再臣於同治二年四月初八日嚴州營次欽奉

寄諭已諭令耆齡卽將所辦閩浙兩省防剿事宜及所部各軍移交左宗棠接辦其浦城防所應卽遴委大員前往抑當如何接辦之處卽由左宗棠酌度奏明辦理耆齡所部廣勇並著於閩浙軍營內選擇善於駕馭之員派令統帶如廣勇實係不能得力有害無利卽著左

宗棠酌量撥遣欽此十四日續奉

寄諭耆齡奏臺灣官軍剿匪情形添派曾元福馳往夾剿並遵將閩省援師分駐金處各屬情形各摺片臺灣逆匪本係烏合之眾乃剿辦幾又一年兵勇愈多未能得手卽此次嘉義解圍亦屬笨港紳民之力居多是否吳鴻源等不能得力抑係事無專責各相觀望卽著統籌全局嚴飭各將士迅將斗六彰化克復及早蕩事並著徐宗幹洪毓琛就近商辦毋任稽延耆齡援浙各軍據該將軍奏稱經費支絀量爲裁減左宗棠所統兵勇

是否足敷布置倘聞軍尙可裁減自應酌量裁汰以節  
餉需欽此臣維耆齡所部兵勇從前原有四大支統領  
粵軍者江西道員康國器統領閩軍者署提督秦如虎  
福甯鎮總兵林文察統領南康勇者參將化孺後以江  
西同知程培霖代之現均撤退無員統帶此外人數稍  
多者石字營一千餘人先係從九鄂太愚管帶後以江  
西知縣孔廣晉代之現亦裁遣惟章武軍千餘人尙留  
浦城係耆齡舊部尙未派員統帶統計援浙一軍兵勇  
從前人數共二萬數千除員名陸續裁撤其現存者不

過一萬三千餘員名就中如南康勇冗雜尤甚尙應裁  
撤而章武軍之千餘人准着齡械稱擬與閩撫臣商酌  
帶赴閩省臣已諾之是援浙一軍賸存不過八千餘人  
而粵勇中之桀驁難馴及患病求歸者臣接辦後尙須  
汰遣至援浙一軍統領除秦如虎署理提督接帶之總  
兵周萬遠已經撤退現在接帶之署處州鎮總兵樂清  
協副將劉萬德亦爲士心所附臣前咨督臣仍歸秦如  
虎調遣其林文察所部臺勇已經前督臣撤遣此時計  
已抵閩統計援浙一軍統領之僅存者惟康國器一員

而已閩粵各軍營官勢均力敵材質亦不相上下就中  
推擇統領苟非其人無以服眾若別由外營派委統領  
彼此不相服習驟難期其妥洽此酌量撤遣非難而另  
派統帶則尚須審慎之實在情形也至浦城地勢在閩  
省固爲衝要而以近日局勢言之賊蹤擾及饒境是浮  
景爲門庭而廣信爲堂奧浦城又在江山玉山廣豐之  
後相距甚遙不必以重兵屯於閒散之地惟閩省轉輸  
入浙則舍舟而陸必問途於此暫以偏師駐之自無不  
可其臺灣一郡爲閩省外郭譬猶鎖鑰臺郡爲鎖澎湖

廈門爲鑰鹿耳門鹿仔港則通鑰之竅也鹿耳鹿港兩處無事則全臺有所恃以無恐而省郡之氣常通臣於數日內接閱各處文報似吳鴻源曾王明未能得力而陽海探報難期確實現與閩撫臣妥慎籌辦以專責成申軍令固人心爲主布置形容當續報又延平府屬沙縣順昌永安等處土匪披猖據署延建邵道曾憲德所稟各屬辦理情形極爲怠玩深屬可慮俟查明確實卽當從嚴參辦以圖力挽頽風閩省吏治軍事積習已深自非及早整頓難期補救臣惟有核實辦理相機調



度以期稍慰我

皇上軫念海疆至意所有覆陳情形謹附片具

奏伏乞

聖鑒訓示施行謹奏

同治二年四月廿八日

議政王軍機大臣奉

旨另有旨欽此

議政王軍機大臣 字寄同治二年五月十八日奉

上諭左宗棠奏官軍截剿富陽新城援賊大勝小挫並  
通籌裁汰閩軍及臺灣等處軍情各摺片已明降諭旨

將陣亡之總兵熊建益等從優賜卹矣此次賊匪徑犯  
新城思襲富陽後路雖經官軍擊退而劉典王文瑞兩  
軍尚須駐院蔣益澧全軍力攻富陽其餘各營分撥上  
下各游防剿兵力實不爲厚是克復杭州尙難剋期而  
待左宗棠現擬將新隸閩軍力圖整飭相機進剿亦是  
因時制宜之法卽著將閩省營兵分別去留認真訓練  
俾成勁旅仍一面於閩粵營官中慎選統領之員派令  
分營管帶庶將識士心士識將意可收餉節兵精之效  
至浦城地方旣無須重兵屯駐卽由左宗棠酌派一軍

駐之以護轉輸運道臺灣小醜剽辦幾及一年總無起  
色吳鴻源曾玉明既不得力卽著與徐宗幹妥慎籌辦  
申明軍令激勵兵心以期早日蕪事沙縣等處土匪披  
猖在事員弁辦理情形極爲怠玩若不從嚴懲辦必致  
軍心益懈賊勢益張於閩省地方大有關係卽著左宗  
棠迅速查明嚴參懲處毋稍徇縱至閩省吏治軍務積  
習已深惟在該督實力整頓力挽頹風以副委任將此  
由六百里諭令知之欽此

同治二年五月十八日內閣奉

上諭左宗棠奏官軍截剿富陽新城援賊情形一摺偽  
聽逆陳炳文等率領悍黨由餘杭趨臨安圖竄新城以  
襲富陽官軍後路經道員魏喻義等督兵追剿殲賊千  
餘賊復乘霧分路來犯攻撲新城官軍俟其逼近城墻  
礮石齊發斃賊不計其數提督高連陞等又督兵往援  
賊眾拋棄攻具向臨安一路鼠竄而去其攻撲新橋之  
賊亦經王東林等奮力衝殺陣斃黃衣賊目一名悍賊  
數十名敗殘餘匪復經兵勇截殺斃賊千計卽著左宗  
棠督率在事員弁兵勇迅克富陽進規杭州以稍遲誤

記名總兵熊建益樸勇善戰人浙以來尤所向有功此  
次憤攻賊壘中礮殉軀深堪憫惻著交部照總兵陣亡  
例從優議卹加恩予諡並於富陽縣建立專祠守備劉  
立號力戰陣亡著一併交部從優議卹以慰忠魂欽此  
附陳誘護盜首顏馬登等斬梟片

再盜首顏馬登向在台溫洋面聚黨行劫上年據溫處  
道友方廉轉據永嘉縣紳士葉品金稟稱該犯情願投  
誠充當水勇效刀贖罪當經前督臣慶端具奏欽奉  
諭旨洋盜顏馬登等五十六名投誠充當水勇並著者

齡左宗棠查明顏馬登等如果真心悔悟立功自贖卽著飭令支方廉妥爲安插毋令滋生事端等因欽此在案詎料該犯顏馬登投誠之後並不歸標仍盤踞海上肆行搶掠並勒抽商漁船稅本年三月間經署溫處道周開錫密飭永嘉縣陳寶善誘拏顏馬登到案一面飛咨護理溫州鎮總兵黃載清將其黨夥金明海等二十三名拏獲並起出私造抽稅旂子四桿證以各處控案情罪確實實屬怙惡不悛法無可宥已飭署溫處道周開錫監提該犯立予斬決梟首犯事地方以昭炯戒其

夥犯顏阿歡陳國勝金明海甘心從匪劫掠商船亦罪無可赦併立予斬決餘黨林新海等二十犯雖係顏馬登臨時雇用然既隨高搶劫情節較重俟研訊確情再行擬結理合附片具

奏伏乞

聖鑒施行謹

奏

同治二年四月廿八日

議政王軍機大臣奉

旨知道欽此

奏報浙師越皖援江迭獲勝仗情形摺

奏爲浙師越皖援江迭獲勝仗現籌辦理情形恭摺奏  
祈

聖鑒事竊劉典一軍將黟縣克復嶺內肅清後迭接江  
西道員段起等械稱各逆大股屯踞於石門陶溪渡茅  
屋嶺楓田街等處距景德鎮僅數十里劉典遂留知府  
朱明亮所部桂營會同王文瑞老湘營扼守祁門令張  
聲恒兩營駐紮漁亭李燿南陳瑞和一營一旂駐紮屯  
溪以固徽婺之防而自率所部四千人由婺源之清華



街甲路以出景德鎮探報賴巢兩逆率大股踞茅屋嶺  
規田街者已擾及高橋洗馬橋等處踞景德鎮不過二  
十里劉典即於五月初九日進紮洗馬橋適道員席寶  
田率所部及仁右營進駐洪源距規田街四十里函約  
初十會剿該逆聞浙師至已於初九夜分路潛遁劉典  
派隊追剿僅斬賊數十名奪獲牛馬二百餘隻而賊之  
大股仍盤踞陶溪渡修築堅壘以圖抗拒我師劉典以  
江西韓營忠勇軍現駐陶溪渡對岸與賊相隔一水足  
以扼其前必分一軍從崇光渡進剿以襲其後庶可扼

其去路以收夾擊之功當與席寶田等商定飭黃少春率五營會合王德榜一軍於十一日進駐梘田街席寶田等亦率所部駐陶溪渡梘田街適中之地相機會剿先是梘田街敗賊竄至鴉橋經江軍參將劉勝祥擊殺百餘人王沐復合軍追殺十餘里斃賊數百名餘賊退往斜溪黃少春等正擬於十四日進剿而斜溪港口橫湧壩等處之賊又分向建德竄去浮梁境內一律肅清江軍王德榜劉勝祥浙軍黃少春聶邦光楊詠春等遂率所部紮橫湧壩陳家墩劉典督同黃有功楊芳桂楊

在田廖渭臣等於十五夜拔營約期十六日會合進剿  
崇光渡之賊並一面檄約席寶田韓進春於是日出隊  
以掣陶溪渡賊勢適僞堵王等並先於是夜乘席寶田  
營壘未固率衆猛撲經席寶田竭力擊退十六日劉典  
率各營進剿崇光渡前隊黃少春王德榜等捲旂疾進  
乘其不備連破賊巢兩處焚賊營五座殺賊八九百名  
生擒百餘名奪獲騾馬五十餘匹賊方由左路敗竄復  
經黃有功場在田廖渭臣等截殺又斃賊二百餘名賊  
向石門一帶竄去其陶溪渡之賊仍負踞如故十九日

席寶田等約劉典會剿劉典率數騎前往偵視見該逆築大壘一座中包數小壘長約數里小港之西又築壘五座相爲犄角官軍分路齊進環攻數時該逆伏匿不出二十三日劉典飭各營移紮茅屋嶺二十四日席寶田由中路屈蟠韓進春由左路劉典率各營由右路直攻陶溪渡賊壘拔開木椿竹籤三十餘層踰濠而進該逆拚死抵拒槍礮如雨折軍副將喻可宗督隊猛進直逼壘下忽被賊槍洞穿太陽左穴親兵搶護而回已經殞命各勇益憤又猛攻逾時賊壘垂破復完者數次官

軍以受傷者多乃收隊還劉典正擬率谷營由陶溪渡  
過河移紮城壘之西席寶田移營而東以困之詎知該  
逆經此次痛擊驚怖殊甚卽於二十五夜向洋塘石門  
而遁劉典立派七營會同江軍席寶田王德榜屈蟠韓  
進春等追剿沿途又殲斃多名其自相踐溺死者不下  
數百名二十八日行抵洋塘該逆列隊抗拒黃有功王  
德榜等督勇奮擊斃悍賊百餘名賊敗走而後路石門  
雞公包之賊大至黃有功王德榜因兵力過單未便深  
入遂收隊還劉典復派黃少春所部四營馳往會勦擬

先剿雞公包之賊而該逆已於二十九日向青山橋一帶逃竄三十日抄軍各營會同王德榜一軍分路進攻石門楊詠春劉大謨等麾勇擊殺守卡賊數十名乘勝逼攻賊壘該逆負固不出官軍射火箭燃其篋棚賊始驚亂黃少春等率所部馳至賊棄壘而遁官軍乘勢掩殺未及里許該逆合併鐵爐岡援賊復圖抗拒適王德榜黃有功聶邦光回由左路埭剿而上棚頭截擊賊大敗越嶺逃竄官軍分路追殺斃賊七八百名楊芳桂率馬隊猛追又斬賊二三百名追至鐵爐岡該逆尙有二

三萬眾見官軍至悉向彭澤地境竄去前後數戰斃賊  
不下數千拔出難民約以萬計此股逆賊自陶溪渡石  
門蔓延彭澤湖口都昌等處經官軍迭次痛剿尙節節  
修築堅壘力圖抗拒蓋知退無所掠必欲由此竄入江  
西腹地也幸各軍乘屢勝之後躡蹤猛追使其喘息未  
定奮力攻剿得將浮梁鄱陽境內一律肅清都昌之賊  
亦聞風下竄現李榕一軍駐紮湖口江忠義一軍亦已  
行入江西將由都昌以趨湖口如機勢濶拍江軍躡其  
後江忠義李榕兩軍阻其前或可聚而殲旃惟由彭澤

可橫竄建德以出祁門劉典一軍尙須防堵宣歙一路未可深進自入江以來無日不戰士卒冒暑過征病者殆半勞瘁異常擬令稍爲休息確審賊蹤趨向以定進止機宜所有此次陣亡之留浙補用副將喻可宗從征數載每戰身先士卒樸誠勇敢出於性生茲竟力戰捐軀深堪憫惜應請

旨照副將例從優議卹陣亡花翎都司張亮華併請

部照例議卹以慰忠魂謹會同協辦大學士兩江總督

臣會國藩江西巡撫

臣

沈葆楨恭摺馳



奏伏乞

皇上聖鑒訓示施行謹

奏

同治二年六月初十日

議政王軍機大臣奉

旨另有旨欽此

軍中患疫擬俟秋涼力圖進取片

再五月以後天氣酷熱異常水泉乾涸禾苗多就枯槁疫氣盛行各營弁勇病者過半營哨各官有物故者新募來浙勇丁染患尤甚地方久經兵燹兇穢之氣與憂

愁鬱結之氣釀此大災蔣益澧劉典魏喻義及水師各營所患情形大約相似臣軍從前兩遭此厄然皆發於夏秋之交未若此次之早者現在祈禱醫調冀早痊可惟體察情形每營勉能出隊者不過三四成一時實難趣戰必俟秋涼疫氣漸減始可督飭各軍力圖進取以赴戎機理合附片具陳伏乞

聖鑒謹

奏 同治二年六月初十日

議政王軍機大臣奉

旨另有旨欽此

請將已革道員勒追京米捐款再行捐輸賑米片  
再江蘇道員楊坊等籍隸浙江家資巨萬膜視邦族奇  
荒不加拯恤前經臣附片

奏明欽奉

諭旨著照左宗棠所擬飭令富紳楊坊等力措鉅款廣  
購米石迅救卹危如敢不遵卽行嚴辦等因欽此當卽  
恭錄行知各該員惟蘭谿縣紳士毛象賢認捐米六千  
石先繳到洋銀一萬零三百圓銀一百三十九兩三錢

五分已分給蘭谿湯溪浦江義烏武義永康龍游建德  
桐廬分水瀆安壽昌新城昌化於潛富陽諸暨等縣買  
米煮賑外其富紳楊坊一員經臣派令捐米五萬石由  
甯紹台道史致諤派員前往催提據史致諤稟稱委員  
候補知縣王晉玉赴滬剴切勸諭該員藉詞推諉抗不  
認捐開導再三迄無著落等情前來伏查楊坊以市儈  
依附洋商致富十數年間擁貲百萬捐納道員從前在  
浙經手洋務往往從中漁利人所共知卽如咸豐六年  
爲前浙江撫臣借用英商啤哩大輪船一隻未及三月

竟開銷洋銀七萬九千餘圓名爲供應洋人實則取歸私橐其昧良嗜利如此此次因浙省奇荒諭令捐米五萬石賑卹災民竟敢藐抗不遵任催罔應旣已因奸致富又復爲富不仁正擬參辦據該員楊坊來稟認捐銀一萬兩并請將籌備京米銀一萬兩歸併浙捐等語查近年南漕停運京倉需米甚急江蘇撫臣飭令該員捐備京米十萬石自應全行措繳豈可移作浙賑卽以浙捐而論臣所派者米五萬石而該員捐銀一萬兩以米準銀僅及三十分之一不過欲藉浙捐爲名希圖諛卸

居心尤爲狡詐相應請

旨飭下江蘇撫臣將已革道員楊坊派捐京米勒限追繳再行押解來浙捐輸賑米以杜規避謹附片具陳伏乞

聖鑒訓示謹

奏 同治二年六月初十日

議政王軍機大臣奉

旨另有旨欽此

議政王軍機大臣 字寄同治二年六月二十九日奉  
上諭左宗棠奏浙師援江獲勝並陳軍營疫氣盛行暨

勒令楊坊捐輸浙米各摺片浙省援江之師會合江軍  
將陶溪渡等處賊壘悉行掃蕩其竄往洋塘石門之賊  
復經劉典會同席寶田等軍馳剿賊眾向彭澤境內竄  
去浮梁鄱陽境內一律肅清都昌之賊亦聞風下竄事  
機甚爲順手刻下李榕一軍駐紮湖口江中義諒已自  
海援隊由都昌直趨湖口即可與江省追躡之師前後  
夾擊以圖聚殲著會國藩左宗棠沈葆楨分飭各軍合  
力掃蕩無任旁竄李榕此次督軍入江前於彭澤境內  
得獲勝仗現已將該員補授浙江鹽運使並著會國藩

傳知該員令其努力功名以圖報稱本日據毛鴻賓奏請調張運蘭並所部老湘營由江入粵除張運蘭已諭令准其帶往其所部老湘營能否調往著曾國藩酌量辦理現在闖入江西之賊本由建德祁門一帶竄出此時被剿窮蹙恐復由原路鋌走左宗棠擬合劉典一軍防堵宜欽一路藉資休息俟確探賊蹤趨向再定進止甚合機宜卽著左宗棠妥籌調度相機辦理陣亡副將喻可宗前據沈葆楨奏已交部照總兵例議卹並加恩予諡其陣亡都司張亮華並著交部照例議卹以慰忠



魏至軍營疫氣盛行蔣益澧劉典魏喻義及水師各營染患實多每營勉能出力者不過三四成覽奏殊深慮系現在已交秋令時疫諒可稍減左宗棠惟當加意撫循以消疹戾一俟疫氣稍除卽行相機進取已革道員楊坊以市僧依附洋商擁貲百萬此時浙省奇荒經左宗棠派令捐賑米五萬石竟敢抗違不遵僅認捐銀一萬兩并請將籌備京米銀一萬兩歸併浙捐實屬嗜利昧良居心狡詐著李鴻章將該革員派捐米十萬石勒限如數追繳一俟繳清卽行押解赴浙交左宗棠辦理

所請勒令捐輸賑米毋任狡展再本日已降旨飭令黃  
贊湯文格來京另候簡用郭嵩燾以三品頂戴署理廣  
東巡撫該省軍務吏治亟須整飭毛鴻賓本日奏到尙  
無啓程日期晏端書黃贊湯均係五日京兆之員辦理  
深恐貽誤著郭嵩燾迅速前赴署任將該省軍務釐務  
及地方吏治妥爲整頓以副委任如郭嵩燾已赴江北  
並著曾國藩李鴻章飛速行知令其迅速由江赴粵毋  
少延緩將此由六百里各諭令知之欽此

請設閩浙總糧臺派員總辦摺

奏爲請設閩浙總糧臺派員總辦以專責成而便支應  
恭摺具

奏仰祈

聖鑒事竊臣於四月初八日欽奉

諭旨補授閩浙總督並統授浙各軍准前督臣耆齡移

交前來除陸續撤遣外總計水陸各營共一萬三千二  
百八十一員名內除南康勇三千零八十四名當由臣

撤遣外其遊擊關鎮國所帶紅單船十號計弁勇四百

十三名准撫臣徐宗幹檄稱現有四號調赴臺灣助剿

餘均留閩其薪糧應由閩省發給道員康國器所部各

營已飭令挑留四千名以備調遣此外尙有彰武軍一

千一百二十一名暫駐浦城經閩撫臣調撥一營赴延

邵剿捕遊匪其素如虎舊部閩字四營并楚勇共一千

九百名現駐閩家堰忠毅軍八百名現駐義橋忠勇漳

詔勇八百零十名現亦調歸義橋經臣飭歸藩司轉益

漕就近統領聽候派撥共計每月薪糧尙需五萬餘兩

浦城向設援浙大營糧臺支應援浙各軍自者齡接任

後又設隨營糧臺支應所部粵勇南康勇彰武軍餉項  
仍由揆浙大營糧臺提撥兩臺並設彼此攸分粵勇南  
康勇已截清本年四月以前之餉此外各營則積欠數  
月不等彼此相形饑飽嶮異浦城糧臺每遇各營催索  
欠餉則諉之福建善後總局比赴閩請領往往徒手空  
歸士多咨怨臣既并統此軍自應歸併總糧臺均勻支  
應以昭公普又臣白入浙以來因本省徵捐俱窮餉需  
奇絀不能設立糧臺是以

奏明暫於江西廣信設立後路糧臺轉輸外省協濟餉

需以資接濟今幸浙東一律肅清兵勇日增師行日遠非由本省設立糧臺無以供軍實而速戎機擬卽於衢州府城設立閩浙總糧臺總司各軍支應查有代辦布政使署杭嘉湖道蘇式敬奏調來浙之湖南卽補道王加敏樸實廉謹堪以總司其事其浦城糧臺相距太遠應卽改爲轉運局專司轉運閩省餉需仍委前辦糧臺之福建道員前署建甯知府汪達專司其事除檄飭遵照外理合專摺

奏明其甯紹中外防軍現仍由甯紹台道設局支應將

來各處用款應統由浙江藩司核銷造報合併聲明伏乞

皇上聖鑒施行謹

奏

同治二年六月初十日

議政王軍機大臣奉

旨知道了欽此

請將貪橫不法之護提督革拏查抄摺

奏爲特參武職大員貪橫不法請

旨革職拏問以肅法紀事竊惟福建一省水陸各提鎮  
多由軍營立功蒙

恩簡放一時未能赴任其越級委護者每以鑽營得之  
軍政之不修武功之不競實由於此臣查護理福建陸

路提督石棟由本標中軍參將升補浙江象山協副將  
未及到任咸豐九年遽護提督聞由黃緣前督臣慶端

幕友莊煥文所致莊煥文赴浙後石棟歲以銀三千兩



致其父此其證也莆田之許鄉有奸民曰許四郊上鄉有奸民曰李松三皆著名匪首地方官屢擊未獲石棟均以六品頂戴賞之七里洋一鄉素爲匪盜淵藪而俞清音俞三音兩人爲之魁兩人均竄名興化協伍籍收爲護符莆田仙遊惠安士民苦其搶劫控案纍纍石棟竟拔俞清音爲把總俞三音爲馬兵人人側目涵江地方汛兵誣民人毀營房石棟帶兵往索兵費番銀四百圓民不應命將縱火焚村舍興化府知府肅作霖給番銀二百五十圓代民請免始止不焚楓亭爲通衢商民

過者石棟縱匪徒強爲挑負貨物行李十里索錢六十  
文名曰買路錢商旅苦之石棟與其戚前侍郎黃宗漢  
之姪捐納知府黃貽檀朋比爲奸勒索富戶大賈稍不  
遂意卽多方傾陷之所造屋宇臺沼均極侈麗爲其子  
石渠捐納遊擊尙未經考驗卽多方營求委署臺灣城  
守參將優缺又爲其族強占泉州城外山地掘毀多塚  
民怨尤甚種種貪橫不法實駭聽聞現准撫臣徐宗幹  
檄商撤任並據署按察使桂超萬稟請參辦前來相應

請

旨將現護福建陸路提督浙江象山協副將石棟革職  
革間按律審擬所有資產一併查抄以儆貪邪而肅法  
紀石棟之子署臺灣城守營參將石渠把總俞清首應  
請一併革職歸案審辦謹據實陳奏伏乞

皇上聖鑒訓示施行謹

奏 同治二年六月初十日

議政王軍機大臣奉

旨另有旨欽此

遊員委署提督篆務片

再福建陸路提督篆務需員署理查有福甯鎮總兵林  
文察廉樸勇敢以之署理斯篆堪期勝任除咨行查照  
外謹附片具

奏伏乞

聖鑒謹

奏 同治二年六月初十日

議政王軍機大臣奉

旨知道了欽此

議政王軍機大臣 字寄同治二年六月二十九日奉

上諭左宗棠奏請將貪橫不法之護提督革拏查抄一  
摺浙江象山協副將石棟質緣前督臣慶端幕友莊煥  
文得護提督本日據左宗棠摺內所參種種貪橫不法  
殊堪髮指出於情理之外石棟著卽革職拏問交左宗  
棠徐宗幹嚴行審訊按律定擬毋稍疏縱所有該革員  
貲產著徐宗幹嚴密查抄以儆官邪該革職之子石渠  
並把總俞清音均著一併革職歸案審辦左宗棠原摺  
著抄給徐宗幹閱看將此由六百里各諭令知之欽此